

ՏԵՂԵԿԱՏՎԱԿԱՆ ՔԱՂԱՔԱԿՐԹՈՒԹՅԱՆ ԿՐՈՆԱԿԱՆ ԲԱՂԿԱՑՈՒՑԻՉՆԵՐԸ

Դավիթ Միքայելյան՝

Գլոբալիզացիայի պայմաններում՝ պոստմոդերնիստական միտումների խորացմանը զուգահեռ, երբ եկեղեցիները, կրոնական կազմակերպությունները, պահպանելով իրենց էությունը, առաքելությունը և նպատակները, ձգտում են տիրապետել հիմնովին աշխարհիկացված ժամանակակից հասարակության սոցիալ-մշակութային լեզվին և համարժեք արձագանքել ժամանակակից մարտահրավերներին, կրոնական գործոնի խնդիրն իր սոցիալական տարաբնույթ ազդակներով, դառնում է առավել արդիական: Վերջին 20 տարիների ընթացքում ակադեմիական շրջանակներում քննարկվող կարևորագույն խնդիրներից մեկը ժամանակակից աշխարհում կրոնական գործոնին վերաբերող խնդիրների արծարծումն էր: Այս համատեքստում քննարկվում էր հատկապես զարգացումների այն մոդելը, ըստ որի՝ կրոնի դերը ժամանակակից աշխարհիկացվող հասարակության մեջ, քաղաքական և տնտեսական բազմազանության աշխարհում, տեխնոլոգիաների զարգացման պայմաններում աստիճանաբար նվազում է, իսկ ավելի ուշ հեռանկարում սպասվում են կրոնական աշխարհայացքի իսպառ անհետացում, կրոնականության զրոյականացում: Սակայն այդ տրամադրությունները գիտության մեջ կարծես մարեցին

^{*}Կրոնագետ, պատմական գիտությունների թեկնածու, ՀՀ կառավարության աշխատակազմի ազգային փոքրամասնությունների և կրոնի հարցերի վարչության փորձագետ:

վերջին տարիների ընթացքում, և ակադեմիական շրջանակներում սկսեցին ավել շատ խոսել այն մասին, որ կրոնական ինստիտուտների կողմից նկատվում է բնական հակազդեցություն աշխարհիկացմանը: Այսպես, գերմանացի փիլիսոփա Յուրգեն Հաբերմասն իր աշխատություններից մեկում գրում է, որ կրոնը պահպանում է հասարակական ազդեցությունը և նշանակությունը, մինչև ժամանակ՝ աշխարհիկացված «վստահությունը» կորցնում է այն համոզմունքը, որ մոդեռնիզացման գործընթացում կրոնն աշխարհում կվերանա¹: Այս տեսանկյունից վերջին ժամանակներս հատկապես մասնագիտական շրջանակներում շատ են խոսում «պոստսեկուլյարիզմի» ժամանակաշրջանի կայացման մասին: Չնայած այն հանգամանքին, որ գոյություն չունի «պոստսեկուլյարիզմ» եզրույթի՝ բոլորի կողմից ընդունելի սահմանում, այնուամենայնիվ, գիտական հանրությունը, թերևս, համաձայն է, որ հասարակության զարգացման ժամանակակից փուլը կապված է աշխարհիկ և կրոնական գիտակցության ձևերի միջև ձևավորվող նոր փոխհարաբերությունների հետ: Եթե աշխարհիկ հասարակության պայմաններում կրոնի դերը նվազեցվում էր և հասարակական առաջընթացի համատեքստում, ժամանակակից զարգացումների պայմաններում նույնիսկ հանգեցվում էր վերացման, ապա «պոստսեկուլյարիզմի» շրջանակներում կրոնը համարվում է հասարակական գիտակցության իմանենտ բաղկացուցիչ, որը ոչ թե անհետանում է հասարակության զարգացմանը զուգահեռ, այլ փոխում է դրսևորման ձևերը՝ հասարակության կառուցվածքում վերիմաստավորվելով տեղի և դերի կտրվածքով: Եվ պատահական չէ, որ Յ.Հաբերմասի կարծիքով՝ «պոստսեկուլյար» հայեցակարգը նկարագրում է արևմտյան հասարակության ժամանակակից իրավիճակը, որտեղ աշխարհիկացումը և աշխարհիկության սկզբունքը հասնում են իրենց ավարտին, և աշխարհիկացումը (սեկուլյարիզմը)՝ իբրև հա-

¹ Տե՛ս <http://www.luther.ru/church/mind/1814-2013-01-03-09-21-06.html>

կակրոնական գաղափարախոսություն, այլևս սպառել կամ սպառում է իրեն: Այսպիսի ընդհանրության տիրություն նախնականորեն և պայմանականորեն «պոստսեկուլյար աշխարհ»-ը կարելի է սահմանել իբրև մի տարածություն, որտեղ կրոնները կրկին սկսում են զգալի և կարևոր տեղ զբաղեցնել ժամանակակից գլոբալացվող հասարակության մեջ: Բայց կրոնի դերի իմաստը և նորացված կրոնականության վերածննդի հնարավոր հետևանքները, աշխարհիկի և կրոնականի նորագույն փոխհարաբերությունները, իհարկե, դեռ երկար ուսումնասիրության առարկաներ կմնան:

20-րդ դարի 80-ականներին շրջանառության մեջ դրվեց կիբեռ-կրոնի (*cyber-religion*) (ռուս կրոնագետ Ի.Ն. Յաբլոկովը նշում է, որ համացանցային կրոնները երբեմն անվանվում են «քվազիկրոններ»)¹ գաղափարը, օնլայն եկեղեցիները և առհասարակ վիրտուալ աշխարհն արդեն 90-ական թվականներին սկսեցին կարևոր դեր կատարել պոստսեկուլյար իրականության ստեղծման և կրոնական գիտակցության նոր ձևաչափի գոյացման տեսանկյունից:

Այս համատեքստում չափազանց կարևոր և արդիական խնդիր է դառնում ժամանակակից քաղաքակրթական զարգացումների առանձնահատկությունները հաշվի առնելով՝ վերլուծել կրոնական միավորումների, կազմակերպությունների, շարժումների՝ տեխնոլոգիական միջավայրում, հատկապես համացանցում հարմարվելու, ինտեգրվելու գործընթացը, արժեքային տեսանկյունից գնահատել դրա նշանակությունը, նկարագրել այն մարտահրավերները, որոնց բախվում են կրոնական կազմակերպություններն ու եկեղեցիները և առհասարակ կրոնական աշխարհայացքն այդ գործընթացում:

Ժամանակակից տեղեկատվական հեղափոխությունը, հիմնվելով համակարգչի և հեռուստահաղորդակցային ցանցերի գործառնական միասնության վրա, արմատապես վերափոխում է մարդկային

¹ См. у Яблоков И.Н., Философия религии. Актуальные проблемы, М., Изд-во РАГС, 2007.

կեցության բոլոր շերտերը, այդ թվում՝ կրոնական գործունեության վերիմաստավորման տեսանկյունից: Տեղեկատվական հեղափոխությունը սեղմում է ժամանակը և տարածությունը, բացում սահմանները, թույլ տալիս կապ հաստատել հավատացյալի հետ աշխարհի ցանկացած կետում՝ վերածելով մարդուն աշխարհի քաղաքացու, իսկ կրոնատաժ մարդուն՝ առավել մեծ համայնքի (կրոնական) անբաժանելի մասի:

Բանն այն է, որ սովորաբար տեղեկատվական քաղաքակրթությունը մենք ընկալում ենք իբրև հասարակություն, որտեղ ավելի ու ավելի աշխատանքային և ազատ ժամանակ է ծախսվում տեղեկատվության արտադրության և սպառման համար: Ելնելով այն իրողությունից, որ եկեղեցին, ըստ ամենայնի, այն հնագույն ինստիտուտներից է, որն անընդհատ զբաղվում է կրոնական (և ոչ միայն) տեղեկատվության արտադրությամբ և տարածմամբ, ուստի և ակնհայտ է դառնում, որ կրոնը, որը որոշակիորեն միավորում է միլիոնավոր և միլիարդավոր մարդկանց, կարելի է համարել տեղեկատվական հասարակության հիմնարար բաղկացուցիչներից մեկը: Այս տեսանկյունից տեղեկատվական քաղաքակրթության շրջանակներում կրոնը, կրոնական կազմակերպությունները զբաղեցնում են բավական կայուն տեղ և այդ տեղի դերն ու նշանակությունը, դրա վերաբերյալ պատկերացումներն անընդհատ փոփոխվում են հասարակության և անհատի գիտակցության մեջ:

Արևմտյան քրիստոնեական վեր-շարժումներն սկզբնական շրջանում սահմանափակվում էին ավանդական քարոզչությամբ, ներեկեղեցական խնդիրների կամ նորությունների քննարկմամբ, սակայն համացանցի հնարավորությունների ընդլայնումը նպաստեց արևմտյան քրիստոնեության միսիոներական գործունեության առաջնահերթությունների հակմանը դեպի վեր-ձևաչափ¹: Այս գործընթացը

¹ Տե՛ս <http://www.bogoslov.ru/text/384529.html>

կարծես թե անխուսափելի էր, քանի որ օրեցօր ավելի շատ թվով մարդիկ են դառնում թվայնացվող միջավայրի մաս. համացանցային «օգտատեր» լինելու հանգամանքը նույնիսկ կենցաղային մակարդակով ներխուժում է մարդու կենսամիջավայր:

Օրինակ, համացանցում քրիստոնեական և այլ կրոնական աշխարհայացքների քարոզչության համատեքստում արդիական է նաև հետևյալ խնդիրը, ինչը գեներացնում է յուրահատուկ երկրնոտրանքային հարացույցներ՝ վիրտուալացնել քրիստոնությունը, թե՞ դրա փոխարեն քրիստոնեականացնել կիրեռմիջավայրը (ի դեպ, այս խնդիրն ակտիվորեն քննարկում են նաև իսլամական և բուդդայական (տվյալ կրոնների պարագայում) համացանցային հանրությունների միջավայրում): Այս երկրնոտրանքի պայմաններում էլ շղթայական կապի տրամաբանությամբ ծագում են բազմաթիվ կարևորագույն հարցեր: Դրանցից մեկը, օրինակ, քարոզչության լեզվի խնդիրն է, այն է՝ թե դարերի ընթացքում նվիրագործված կրոնական ավանդույթներն ինչպիսի լեզվով պետք է հասանելի դառնան համացանցային օգտատիրոջը՝ հաշվի առնելով նաև այն հանգամանքը, որ սոցիալական ցանցերում կիրառվող լեզուն ամենևին էլ դասական կամ ակադեմիական չէ: Պետք է նաև հաշվի առնել այն իրողությունը, որ համացանցում ընթերցանությամբ (տեքստի հետ աշխատանքը) տեղեկատվության յուրացման գործընթացը սրընթացորեն զիջում է տեսալսողական ձևաչափի նյութերին՝ աուդիո, վիդեո, մուլտիմեդիա, այդ թվում՝ համակարգչային խաղերը¹: Ակնհայտ է, որ մարդկանց՝ տեքստի հետ աշխատելու ցանկությունն օրեցօր օբյեկտիվորեն զիջում է տեղեկատվության ստացման վերոհիշյալ միջոցներին: Իսկ այս պարագայում անհատական մակարդակում հատկապես զարգանում է հոգևոր-կրոնական արժեքների յուրացման վիզուալացված գիտակցությունը, այն ձևաչափը, որի դեպքում կրոնական բովանդակության

¹ Տե՛ս <http://www.bogoslov.ru/text/384529.html>

նյութը հասանելի է դառնում պատկերի և ձայնի թվային վերարտադրության միջոցով:

Ժամանակակից տեխնոլոգիաներն անխուսափելիորեն բերում են նաև այն արժեհամակարգի կորստյանը, ինչը երկար ժամանակի ընթացքում ձևավորվել է մարդու մեջ: Կրոնական հաղորդակցության ինտենսիվության գործընթացը տեղեկատվական քաղաքակրթության շրջանակներում պահանջում է համարժեք դինամիկություն թե՛ կրոնական կազմակերպություններից, թե՛ գիտական հանրությից:

Ժամանակակից կրոնական ինստիտուտների ինտելեկտուալ վերնախավում ամուր արմատներ է գցում այն մտայնությունը, որ «կրոնական արտադրանքի» ավանդական տարբերակները (կրոնական գրականության հրատարակում և տարածում, կենդանի կրոնական քարոզ և այլն) այլևս կորցնում են իրենց արդիականությունը: Կրոնական առաջնորդները գիտակցում են, որ ժամանակակից տեխնոլոգիական ռեսուրսների անտեսումը և դրանց պատշաճ չօգտագործումը կարող են բերել սեփական կրոնական համայնքների ազդեցության նվազեցման և սեփական առաքելության անիրագործելիության:

Անշուշտ, ժամանակակից մարդու ժամանակի սղությունը և առօրյա աշխատանքային ահագնացող տեմպը նվազագույնի են մոտեցնում վերջինիս՝ եկեղեցի կամ կրոնական հավաքատեղի, երկրպագության վայրեր հաճախելու հնարավորությունները: Փաստորեն, այնպիսի իրավիճակ է ստեղծվում, երբ մարդու զուտ ֆիզիկական ներկայությունը կենդանի կրոնական համայնքում դառնում է հազվադեպ երևույթ¹, փոխվում է մարդու կրոնական համայնքի մասնիկ լինելու՝ դարերի ընթացքում ամրապնդված կրոնական ապրումների էությունը. այն կամ վերափոխվում է՝ դառնալով խիստ անհատականացված մտահայեցողական կրոնական ապրում, որն, անշուշտ, ազդում է նաև նրա սոցիալականացման գործընթացի և վար-

¹ Տե՛ս <http://newsinphoto.ru/technologii/svyashhennye-texnologii-religiya-i-duxovnost-2-0/>

քաղաքի վրա, կամ «կենդանի համայնքի մասնիկ» լինելու ավանդական զգացողությունն իսպառ վերանում է:

Եվ ահա, նմանատիպ մարտահրավերների պարագայում, ասել է թե՛ մարդկային մտածողության հարացույցների փոփոխության, հասարակական գիտակցության զանգվածային աշխարհիկացման, գիտատեխնիկական և տեղեկատվական հեղափոխության, սոցիալական և բնապահպանական աղետների պայմաններում ժամանակակից քրիստոնեությունն, օրինակ (և ոչ միայն քրիստոնեությունը), ստիպված է արձագանքել «ժամանակի մարտահրավերներին», փնտրել և մարդուն առաջարկել վերջինիս հոգևոր կեցության այնպիսի հիմքեր, որոնք կարող են պատասխանել անընդհատ փոփոխվող աշխարհի հավերժական էքզիստենցիալիստական հարցերին: Միաժամանակ, հաղորդակցության միջոցների բազմազանության մասսայականացման գործընթացի համատեքստում արդեն զարմանալի չէ այն փաստը, որ կրոնական կազմակերպություններն առավել ակտիվ են համացանցի յուրացման գործում. հաղորդակցության նոր հնարավորությունները տրանսֆորմացնում են ավանդական կրոնական պրակտիկան և կրոնական ինստիտուտները: Ավելին, կարծիք կա, և այդ մոտեցումն ամենևին էլ անհիմն չէ, որ կրոնական բնույթի տեղեկատվական ռեսուրսների հասանելիությունը նպաստում է կրոնական աշխարհայացքի զարգացմանը՝ թե՛ անհատական, թե՛ հասարակական մակարդակներում: Այս տեսանկյունից տեղեկատվության փնտրտուքը համացանցում ոչ միայն զուտ տեխնիկական և հաղորդակցային գործողություն է, այլև անհատական մակարդակում վերածվում է հոգևոր փնտրումի կարևորագույն բաղկացուցչի, մեծ իմաստով՝ նաև ճշմարտության որոնման էքզիստենցիալ իրողության, սակրալ գործողության:

Ժամանակակից քրիստոնեությանը նաև մեկ այլ մարտահրավեր է նետված. գիտության նկատմամբ վստահության զգալի անկման

պայմաններում նկատվում է նաև արտադավանանքային միասնացիզմի, օկուլտիզմի, այլ կրոնականության տարբերով օժտված երևույթների մասսայականացման գործընթաց: Նման երևույթները, չլինելով ավանդական համակարգեր, սակայն տեղեկատվական միջոցներով անընդհատ հրամցվելով հասարակությանը՝ զանգվածային բնույթ են ստանում և դառնում մարդու սոցիալական և մշակութային վարքագծի մի մաս: Իսկ մի շարք նոր կրոնական շարժումներ նաև փորձում են հասարակության մեջ այն համոզմունքն ստեղծել, ըստ որի՝ իրենք՝ նույնքան տիրապետում են ավանդույթի ուժին, որքան, ասենք՝ ավանդական կառույցների որակով հանդես եկող կազմակերպությունները: Այսօր կարելի է դիտարկել նաև նոր կրոնական համակարգերի առաջացման գործընթաց (կրիշնայականներ, մոդեռնիզացված կաբբալայի դպրոցներ, խարիզմատներ և այլն), որոնք լայնորեն օգտագործում են տեղեկատվական տեխնոլոգիաները և փորձում են ամբողջ աշխարհում ներկայանալ հասարակական տարբեր մակարդակներում՝ օգտագործելով հենց տեղեկատվական գործիքներ:

Մյուս կողմից՝ հստակ դիտարկվում է նաև այն իրողությունը, որ կրոնական կազմակերպությունները ստանում են առանց սահմանների և գլոբալ գործունեության հնարավորություն, կրոնական հաղորդակցությունը դառնում է առավել ինտենսիվ և հազեցած՝ ձեռք բերելով աննախադեպ դինամիկա: Ժամանակակից հեռուստահաղորդակցության համակարգի պայմաններում կրոնական պահանջների ինդիվիդուալացման գործընթացի խորացումը կարող է բերել և արդեն իսկ բերել է, այսպես կոչված, «տնային եկեղեցու» ստեղծմանը, որն էլ, իր հերթին, շարունակաբար ինտեգրվում է համացանցի և կիբեռմիջավայրի հետ: Այս պարագայում կրոնական աշխարհայացքում, ինչպես արդեն ասվեց, կարող են տեղի ունենալ էական փոփոխություններ: Ավելին՝ համակարգչային տեխնոլոգիաների ազդեցությամբ արմատական վերափոխումները զանգվածային գիտակցու-

թյան մեջ մեծապես ամրապնդեցին ռելյատիվիստական մոտեցումները՝ ջնջելով սահմաններն իրականության և վիրտուալության միջև¹: Համացանցում կրոնական գիտակցության ինտեգրմամբ զբաղվող ուսումնասիրողներն իրավամբ նկատել են, որ կիբեռտեխնոլոգիաների միջոցով իրականությունից գրեթե չտարբերվող, մտացածին աշխարհների ստեղծումը որոշակիորեն ճգնաժամային իրավիճակ ստեղծեց ավանդական կրոնական համակարգերում՝ հնարավորություն ընձեռելով բարձր տեխնոլոգիաների ասպարեզում թափ հավաքող և առանց բարդությունների զարգացող «Նոր դար» կրոնական շարժումներին ավելի ինտենսիվ դարձնել իրենց քարոզամեքենաները: Նույնիսկ բանը հասավ նրան, որ որոշ դեպքերում նոր կրոնական միավորումների կողմից աստվածացվում էր կիբեռմիջավայրը², այն իմաստով, որ մարդը համակարգչի առջև, օգտվելով հրահանգավորելու և ստեղծելու օպերացիոն համակարգերից, կատարում է արարչի գործառույթ (Արարչի իմիտացիա), այդ տեսանկյունից մարդը համարվեց Աստված-Արարիչ իրեն վերապահված փոքրիկ միջավայրում՝ աշխարհը վերափոխելու իր բացառիկ հնարավորություններով:

Արդեն անհերքելի իրողություն է դառնում այն հանգամանքը, որ կրոնական հաղորդակցությունը համացանցում առավել ինտենսիվ է և բովանդակությամբ հարուստ, քան հեռահաղորդակցության այլ բնագավառներում. կրոնական բնույթի տեքստերը, տեսահոլովակները և ցանցային այլ ձևերը մի քանի անգամ ավելի շատ են և որակյալ, քան, ասենք՝ նույն հեռուստատեսային դաշտի համապատասխան նյութերը: Այս տեսանկյունից կրոնական բազմաթիվ կազմակերպությունների հեռուստատեսային ռեսուրսները ևս որոշակիորեն կորցնում են իրենց արդիականությունը:

¹Տե՛ս Դ.Մ. Минченко, РЕЛИГИЯ, СВОБОДА СОВЕСТИ И НОВЫЕ ТЕХНОЛОГИИ В ПОСТСЕКУЛЯРНОМ МИРЕ.

http://www.lib.tpu.ru/fulltext/v/Bulletin_TPU/2012/v321/i6/31.pdf

² Նույն տեղում:

Արևմուտքում այսօր համացանցային եկեղեցիներն աստիճանաբար զանգվածային երևույթ են դառնում (օրինակ՝ *The Internet Church Of Christ*, <http://www.internetchurchofchrist.org> և այլն): Այս երևույթի օրինաչափ զարգացումը նախ կապվում է այն հանգամանքի հետ, որ մարդը, անկախ որոշակի տարածքում գտնվելու անհրաժեշտությունից և ժամանակի սղության գործոնից, հնարավորություն է ունենում իրեն լավ և դրականորեն տրամադրված հանրության մաս լինել: Ցանցային եկեղեցիներին հատուկ լիարժեքության գործոնն, իհարկե, արմատական տարբերություններ ունի հատկապես ավանդական եկեղեցիների՝ համացանցի վերաբերյալ ունեցած պատկերացումների ֆոնի համեմատ: Այսպես, եթե համացանցային մի շարք եկեղեցիների համար (հիմնականում նորբողոքական շարժման տարբեր ուղղություններ) օնլայն ապաշխարության խորհրդի իրականացումը սովորական երևույթ է, ապա բազմաթիվ ավանդական եկեղեցիների համար եկեղեցական այդ կարևորագույն խորհուրդը կարող է իրականացվել բացառապես կենդանի ճանապարհով, անմիջական հոգևոր շփման միջոցով: Այս տեսանկյունից համացանցն ավանդական եկեղեցիների համար հիմնականում ծառայում է որպես տեղեկատվության փոխանակման, հաղորդակացության միջոց և ոչ իբրև նվիրագործված կրոնական խորհուրդների կատարման այլընտրանքային ճանապարհ:

Պետք է հաշվի առնել նաև, որ ավանդական կրոնական կազմակերպությունների գործունեությունը համացանցում բարդանում է այն տեսանկյունից, որ նախ՝ համացանցը նպաստում է արմատական կարծիքների դրսևորմանը՝ դառնալով յուրօրինակ սնուցող միջավայր այնպիսի ծայրահեղական շարժումների համար, որոնք ավանդական կրոնականության տեսանկյունից իրենց համարում են լեգիտիմ, և երկրորդ՝ նկատվում է սուր մրցակցություն էզոթերիկ, հեթանոսական և, այսպես կոչված, «քվադրկրոնական» շարժումների կողմից (օրինակ՝ «Նոր դար» շարժումը), որոնք ավելի հեշտ են ինտեգրվում ցանցային միջավայրերում:

Բացի այդ, համացանցը նպաստում է մարդու կրոնականության արտահայտման ձևերի վերափոխումներին: Ինտեգրվելով համացանցային տարբեր հանրությունների միջավայրում՝ մարդը ձեռք է բերում այսպես կոչված «երկրորդ կրոնական ինքնություն»՝ անկախ նրանից, որ վերջինս իրական կրոնական համայնքի անդամ է (համապատասխանորեն ձևավորվում են նաև միջանձնային նոր հարաբերություններ, միջավայր է ստեղծվում տեսական-կրոնական բնության բանավեճի և երկխոսության համար): Եվ հաճախ վիրտուալ կյանքը դառնում է բազմազան և առավել շատ է համապատասխանում անհատի կրոնական և մտավոր պահանջմունքներին, քան կենդանի համայնքի մաս կազմելը:

Միևնույն ժամանակ, տեղեկատվական քաղաքակրթության ամբողջական ներազդեցության արդյունքում ի հայտ են գալիս մի շարք բացասական հետևանքներ: Կոնֆեսիոնալ հակազդեցությունները՝ իբրև անհանդուրժողականության մեղալի հակառակ կողմ, իրենց մեջ կրում են նաև սոցիալական և մշակութային հակամարտությունների իրական վտանգներ: Սակայն անհանդուրժողականության հետ մեկտեղ, դեպի կրոնական համակարգեր առավել ակտիվ սկսեցին ներթափանցել կրոնական սինկրետիզմը և պոստմոդեռնիստական պլյուրալիզմը: Այս երևույթները հատկապես հատուկ են Եվրոպային, որտեղ մի կողմից՝ մուսլք են գործել արևելյան կրոնական էկլեկտիզմի տարրեր, մյուս կողմից՝ ամերիկյան նեոլիբերալիզմի շունչը:

Նման պայմաններն ավանդական եկեղեցական համակարգերում¹ անխուսափելիորեն առաջացնում են նորագույն գործիքներ մշակելու կենսական անհրաժեշտություն, որոնք հնարավորություն

¹ Այսպես, օրինակ, Հայ Առաքելական եկեղեցու հետևորդների համար վիրտուալ շփումը չի կարող լիարժեքորեն փոխարինել մարդու եկեղեցական ծիսակատարություններին և խորհուրդներին մասնակցելու հոգևոր փորձին, և այս իմաստով որոշակի երկվություն է առաջանում ավանդական եկեղեցիների հետևորդի իրական կրոնական ապրումի մեջ, մինչդեռ, ինչպես արդեն ասվեց, ասենք՝ նորբողոքական շարժումների դեպքում այս գործընթացն ավելի դյուրին է:

կտան պահպանելու հասարակության մեջ ունեցած կշիռը, ադապտացվելու ժամանակակից հասարակությանը՝ չկորցնելով սեփական նվիրագործված ավանդույթները և արժանապատվորեն դիմագրավելու կեղծկրոնական հայեցակարգերին և գաղափարներին:

Մեպտեմբեր, 2013թ.

РЕЛИГИОЗНЫЕ КОМПОНЕНТЫ ИНФОРМАЦИОННОЙ ПОЛИТИКИ

Давид Микаелян

Резюме

В условиях глобализации, когда церкви, религиозные организации, сохраняя свою сущность, миссию и цели, стремятся овладеть социально-культурным языком современного секуляризованного общества и адекватно реагировать на современные вызовы, религиозный фактор становится актуальнее. Одним из важнейших вопросов, обсуждаемых в академических кругах последние 20 лет, является выявление проблем, связанных с религиозным фактором. Религиозный фактор рассматривается в статье в рамках «постсекуляризма».